



**Innuttaasut pisariaqartitsilernerni ukioq kaajallallugu kigutigissaasoqarfiunngitsuni najugaqartut tassanngaannartumik suliaritittariaqartut isumagineqarfissaminnut qaninnermut angalanissaminnut akiliutissaannik ikiorserneqarsinnaaqullugit Peqqinnissaqarfiup sullissineri il.il. pillugit Inatsisartut peqqussutaata nr. 15-ip, 6. november 1997-imeersup allangortinnissaanik Naalakkersuisut peqquneqarnis-saannik Inatsisartut aalajangiiffigisassaattut siunnersuut.**

(Inatsisartunut Ilaasortaq Juliane Henningsen, Inuit Ataqatigiit)

### **Siullermeerneqarnera**

Inatsisartunut ilaasortaq Juliane Henningsen Inuit Ataqatigiit aalajangiiffigisassatut siunnersuuteqarpoq, tassalu innuttaasut ukioq kaajallallugu kigutileritinnissamut periarfissaqanngitsuni angalanermut akiliutissanik ikiorserneqarsinnaanerisa pitsaanerulernissaanik anguniagaqartumik, tamannalu Partii Naleqqamiit oqaaseqarfigissavarput.

Innuttaasutut peqqinnissaqarfimmi sullinneqarnitsinni sumi najugaqaralaruttaluunniit toqqissilluta peqqinnissaqarfimmiit sullinneqarlutalu kiffartuunneqarnissarput naatsorsuutigalugulu kissaatigisarparput, napparsimaguttalu ikiorneqarnissarput kissaatigisarlugu, kisianni tamanna ilaatigut sumiiffiit ilaanni anguneqanngitsoortarpoq, tamannalu nappaateqartunut erloqinartumik ilaqutaanullu misigititsisarpoq, ilaatigummi napparsimasunut ikiorneqanngitsoortunut erloqinartorsiortitsisarpoq eqqugaasunut nuanninngitsumik.

Siunnersuuteqartup saqqummiussaa pissutsinik piviusunik tunngaveqartoq Partii Naleqqamiit oqaatigissavarput. Ajornartorsiut annertuujusoq, nunaqarfinni isorliunerusunilu piviusuusoq oqaatigisaqariaqarpoq aaqittariaqarlunilu.

Kigutit nakorsaanukarniaraanni angalanermut akiliunneqarsinnaaneq assut ajornartorsiutigineqartarpoq pingaartumik akissakinnerusunut, tamannalu nunaqarfinni najugalinnut ilungersunartumik kinguneqartarpoq, tassami akissaqanngivikkaanni kigutilerisumut

ikiorneqarnissaq pinngitsoorneqartarpoq, taannalu aporfiusartooq aaqqittariaqartoq Partii Naleqqamiit siunnersuuteqartoq isumaqatigilluinnarparput.

Assersuutigalugu sumiiffinni amerlanerpaani, isorliunerusunilu silaannakkut angallassisoqartarpoq, angalanerlu akikitsuinnaanngilaq, tamannalu inunnut pissakinnerusunut assut kigutit nakorsaanukarniartunut ajornartorsiutaasarpoq, tassami angalanermi akit eqqarsaatigalugit ilaat akissaqarnermikkut ajornartoortarmata, taamaalillutik pisariaqartitsigaluarlutik ajoraluartumik ikiorserneqanngitsoortarput, tassami angalanissaminnut akissaqannginnertik pillugu aallanngitsoortariaqartarlutik.

Tassami napparsimasut allat, napparsimavimmut misissortikkiartortut angalanissaminnut qujanartumik akiliunneqartarput, taamaalillutik ikiorserneqarfissaminnut apuuttarlutik.

Kisianni tassa kigutit nakorsaanukarniartut periarfissaat killeqarnerujussuusarput, tassami aamma kigutit inuup nerisaqarnikkut peqqissuunissaanut pingaartorujussuummata, taamaattumik sapinngisamik aporfeqarpallaanngitsumik kigutit nakorsaqanngitsuniit kigutit nakorsaanukarsinnaaneq anguniarlugu suleqatigiissutigisariaqarparput, nunaqarfimmiut pitsaanerujussuarmik angalasinnaanerannut nakorsiartullu ineqartarnerannut tunngasut aaqqittariaqarput.

Peqqinnissamut tunngasut aporfeqarpata sapinngisamik aporfiusut peerneqarnissaat tamatta ataatsimooruttariaqarparput, tassami uani ajornartorsiut Partii Naleqqamiit aaqqinneqassasoq kissaatigaarput, Naalakkersuisullu itigartitsinerat pakatsinarpoq.

Tassami aamma meeqqat tassani eqqornerlunneqartarput, meeqqammi kisimiillutik nakorsamut angalasinnaanngillat, meeqqallu pinngitsooratik aamma angalanermi ingiallorteqartussaataallutik, tassami kisimiillutik meeqqat angalanissaat angalatitsivinniit itigartinneqartarpoq.

Soormi aatsaat kiguserilerpata ikiorneqarnissaannut periarfissaqartitsineq ilumut taanna kisiat periarfissaasariaqarnersoq apeqquserparput, tassami piviusut qiviaraanni assorujussuaq nunaqarfimmiut ajornartorsiutigisarpaat kigutilerisumut apuunniartarneq, tamannalu ajornartorsiut aaqqinniartariaqarpoq tamatsinnut, sumiluunniimmi najugaqaraluarutta pitsaasumik kigutileritinnermi atugassarititaasut pitsaanerusut eqqarsaatigalugit.

Tamatta peqqissuunissarput inuiaqatigiinni pingaartipparput, aammalu innuttaasut nappaammik eqqorneqarsimagunik imaluunniit kigutit nakorsaanukarnissamut sapinngisamik aporfissaqarpallaanngitsumik ikiorneqarnissaminut pisinnaasariaqarput.

Siunnersuuteqartup Juliane Henningsen-ip Inuit ataqatigiit, kigutit nakorsaanukarnermi pissutsit pitsanngorsarnissaanik anguniagaqartumik saqqummiussaqaqarnera tamakkiisumik taperserparput.

Tamannalu tunngavigalugu peqqinnissami ataatsimiititaliami suliarineqarnissaa innersuussutigaarput.